

雜阿含 932 經 [正聞本 13272 經/佛光本 924 經]

(釋氏相應/道品誦/如來記說)

如是我聞：

一時，佛住迦毗羅衛國尼拘律園中。

時，有眾多比丘集於食堂，為世尊縫衣。

時，釋氏摩訶男聞眾多比丘集於食堂，為世尊縫衣：

「世尊不久，三月安居訖，作衣竟，持衣鉢人間遊行。」

聞已，往詣佛所，稽首佛足，退坐一面，白佛言：

「世尊！我四體不攝，迷於四方，聞法悉忘，以聞眾多比丘集於食堂，為世尊縫衣：『世尊不久，安居訖，作衣竟，持衣鉢人間遊行。』是故，我今思惟：『何時當復得見世尊及諸知識比丘？』」

佛告摩訶男：

「汝正使見世尊、不見世尊，見諸知識比丘及與不見，但當念於五法，精勤修習。摩訶男！當以正信為主、非不正信；戒具足；聞具足；施具足；慧具足為本、非不智慧，如是，摩訶男！依此五法修六念處，何等為六？此，摩訶男！念如來，當如是念：『如來、應、等正覺，……乃至佛、世尊。』當念法……僧……戒……施……天事……乃至自行得智慧。」

如是，摩訶男！聖弟子成就十一法者，則為學跡，終不

腐敗，堪任知見，堪任決定，住甘露門，近於甘露，不能一切疾得甘露涅槃。譬如：伏雞伏其卵，或五或十，隨時消息，愛護將養，正復中間放逸，猶能以爪、以口，啄卵得生其子，所以者何？以彼雞母初隨時消息，善愛護故，如是，聖弟子成就十一法者，住於學跡，終不腐敗，……乃至不能一切疾得甘露涅槃。」

佛說此經已，摩訶男釋氏聞佛所說，歡喜、隨喜，作禮而去。

**雜阿含 980 經** [正聞本 13321 經/佛光本 972 經]

(雜相應/道品誦/如來記說)

如是我聞：

一時，佛在跋耆人間遊行，至毘舍離國，住獼猴池側重閣講堂。

時，毘舍離國有眾多賈客，欲向怛剎尸羅國，方便莊嚴。

是眾多賈客聞世尊於跋耆人間遊行，至毘舍離國，住獼猴池側重閣講堂。

聞已，來詣佛所，稽首佛足，退坐一面。

佛為諸賈客種種說法，示、教、照、喜；示、教、照、喜已，默然而住。

時，諸賈客從坐起，整衣服，為佛作禮，合掌白佛言：

「世尊！我等諸賈客，方便莊嚴，欲至怛剎尸羅國，唯願世尊與諸大眾，明旦受我供養。」

爾時，世尊默然而許。

時，諸賈客知世尊受請已，從坐起，禮佛足，各還自家，辦種種淨美飲食，敷床座，安置淨水。

晨朝遣使白佛：「時到。」

爾時，世尊與諸大眾著衣持鉢，詣諸賈客所，就座而坐。

時，諸賈客以淨美飲食，自手供養。

食畢，洗鉢訖，取卑小床，於大眾前坐，聽佛說法。

爾時，世尊告諸賈客：

「汝等當行於曠野中，有諸恐怖，心驚毛豎，爾時，當念如來事：謂：如來、應、等正覺，……乃至佛、世尊，如是念者，恐怖則除。

又念法事：佛正法律，現法、能離熾然、不待時節、通達親近、緣自覺知。

又念僧事：世尊弟子善向、正向、……乃至世間福田。如是念者，恐怖即除。

過去世時，天、阿須輪共鬥時，天帝釋告諸天眾：『汝等與阿須輪共鬥戰之時，生恐怖者，當念我幢，名摧伏幢，念彼幢時，恐怖得除，若不念我幢者，當念伊舍那天子幢；

若不念伊舍那天子幢者，當念婆留那天子幢，念彼幢時，恐怖即除。』

如是，諸商人！汝等於曠野中有恐怖者，當念如來事、法事、僧事。」

爾時，世尊為諸毘舍離賈客，說供養隨喜偈：

「供養比丘僧，飲食隨時服，專念諦思惟，正知而行捨。  
淨物良福田，汝等悉具足，緣斯功德利，長夜獲安樂。  
發心有所求，眾利悉皆應，兩足四足安，道路往來安。  
夜安晝亦安，一切離諸惡，如沃壤良田，精純好種子。  
溉灌以時澤，收實不可量，淨戒良福田，精儲饒種子。  
正行以將順，終期妙果成，是故行施者，欲求備眾德。  
當隨智慧行，眾果自然備，於明行足尊，正心盡恭敬。  
殖眾善本，終獲大福利，如實知世間，得具備正見。  
具足見正道，具足而昇進，遠離一切垢，逮得涅槃道，  
究竟於苦邊，是名備眾德。」

爾時，世尊為諸毘舍離賈客說種種法，示、教、照、喜已，從坐起去。

## 雜阿含 103 經 [正聞本 171 經/佛光本 105 經]

(陰相應/五陰誦/修多羅)

如是我聞：

一時，有眾多上座比丘住拘舍彌國瞿師羅園。

時，有差摩比丘住拘舍彌國跋陀梨園，身得重病。

時，有陀婆比丘為瞻病者。

時，陀婆比丘詣諸上座比丘，禮諸上座比丘足，於一面住。

諸上座比丘告陀婆比丘言：

「汝往詣差摩比丘所，語言：『諸上座問汝：身小差，安隱，苦患不增劇耶？』」

時，陀婆比丘受諸上座比丘教，至差摩比丘所，語差摩比丘言：

「諸上座比丘問訊，汝苦患漸差不？眾苦不至增耶？」

差摩比丘語陀婆比丘言：

「我病不差，不安隱，身諸苦轉增無救，譬如：多力士夫取羸劣人，以繩繼頭，兩手急絞，極大苦痛，我今苦痛有過於彼；譬如屠牛：以利刀生割其腹，取其內藏，其牛腹痛，當何可堪！我今腹痛，甚於彼牛；如：二力士捉一劣夫，懸著火上，燒其兩足，我今兩足，熱過於彼。」

時，陀婆比丘還至諸上座所，以差摩比丘所說病狀，具

白諸上座。

時，諸上座還遣陀婆比丘至差摩比丘所，語差摩比丘言：

「世尊所說，有五受陰，何等為五？色受陰，受、想、行、識受陰，汝，差摩！能少觀察此五受陰非我、非我所耶？」

時，陀婆比丘受諸上座比丘教已，往語差摩比丘言：

「諸上座語汝：『世尊說五受陰，汝能少觀察非我、非我所耶？』」

差摩比丘語陀婆言：

「我於彼五受陰能觀察非我、非我所。」

陀婆比丘還白諸上座：

「差摩比丘言：『我於五受陰能觀察非我、非我所。』」

諸上座比丘復遣陀婆比丘語差摩比丘言：

「汝能於五受陰觀察非我、非我所，如漏盡阿羅漢耶？」

時，陀婆比丘受諸上座比丘教，往詣差摩比丘所，語差摩言：

「比丘！能如是觀五受陰者，如漏盡阿羅漢耶？」

差摩比丘語陀婆比丘言：

「我觀五受陰非我、非我所，非漏盡阿羅漢也。」

時，陀婆比丘還至諸上座所，白諸上座：

「差摩比丘言：『我觀五受陰非我、非我所，而非漏盡阿羅漢也。』」

時，諸上座語陀婆比丘：

「汝復還語差摩比丘：『汝言我觀五受陰非我、非我所，而非漏盡阿羅漢，前後相違！』」

陀婆比丘受諸上座比丘教，往語差摩比丘：

「汝言我觀五受陰非我、非我所，而非漏盡阿羅漢，前後相違！」

差摩比丘語陀婆比丘言：

「我於五受陰觀察非我、非我所，而非阿羅漢者，我於我慢、我欲、我使，未斷、未知、未離、未吐。」

陀婆比丘還至諸上座所，白諸上座：

「差摩比丘言：『我於五受陰，觀察非我、非我所，而非漏盡阿羅漢者，於五受陰我慢、我欲、我使，未斷、未知、未離，未吐。』」

諸上座復遣陀婆比丘語差摩比丘言：

「汝言有我，於何所有我？為色是我？為我異色？受……想……行……識是我？為我異識耶？」

差摩比丘語陀婆比丘言：

「我不言色是我，我異色；受……想……行……識是我，我異識，然，於五受陰我慢、我欲、我使，未斷、未知、未離、未吐。」

差摩比丘語陀婆比丘言：

「何煩令汝馱(驅)馳往反，汝取杖來，我自扶杖詣彼上座，願授以杖！」

差摩比丘即自扶杖，詣諸上座。

時，諸上座遙見差摩比丘扶杖而來，自為敷座，安停脚机，自往迎接，為持衣鉢，命令就座，共相慰勞。

慰勞已，語差摩比丘言：

「汝言我慢，何所見我？色是我耶？我異色耶？受……想……行……識是我耶？我異識耶？」

差摩比丘白言：

「非色是我，非我異色；非受……想……行……識是我，非我異識，然於五受陰我慢、我欲、我使，未斷、未知、未離、未吐。

譬如：優鉢羅、鉢曇摩、拘牟頭、分陀利華香，為即根香耶？為香異根耶？為莖、葉、鬚、精麤香耶？為香異精麤耶？為等說不？」

諸上座答言：

「不也，差摩比丘！非優鉢羅、鉢曇摩、拘牟頭、分陀利根即是香，非香異根，亦非莖、葉、鬚、精麤是香，亦非香異精麤也。」

差摩比丘復問：「彼何等香？」

上座答言：「是華香。」



差摩比丘復言：

「我亦如是：非色即我，我不離色；非受……想……行……識即我，我不離識，然，我於五受陰見非我、非我所，而於我慢、我欲、我使，未斷、未知、未離、未吐。

諸上座！聽我說譬，凡智者因譬類得解。

譬如：乳母衣付浣衣者，以種種灰湯浣濯塵垢，猶有餘氣，要以種種雜香薰令消滅。

如是，多聞聖弟子雖於五受陰，正觀非我、非我所，然於五受陰我慢、我欲、我使，未斷、未知、未離、未吐，然後於五受陰增進思惟，觀察生滅：此色，此色集，此色滅；此受……想……行……識，此識集，此識滅，於五受陰如是觀生滅已，我慢、我欲、我使一切悉除，是名真實正觀。」

差摩比丘說此法時，彼諸上座遠塵、離垢得法眼淨，差摩比丘不起諸漏，心得解脫，法喜利故，身病悉除。

時，諸上座比丘語差摩比丘言：

「我聞仁者初所說，已解、已樂，況復重聞！所以問者，欲發仁者微妙辯才，非為憍亂，汝便堪能廣說如來、應、等正覺法。」

時，諸上座聞差摩比丘所說，歡喜奉行。

雜阿含 287 經 [正聞本 468 經/佛光本 325 經]

(因緣相應/雜因誦/修多羅)

如是我聞：

一時，佛住舍衛國祇樹給孤獨園。

爾時，世尊告諸比丘：

「我憶宿命，未成正覺時，獨一靜處，專精禪思，作是念：

『何法有故，老死有？何法緣故，老死有？』

即正思惟，生如實無間等：『生有故，老死有；生緣故，老死有。』

如是，有……取……愛……受……觸……六入處……名色，

『何法有故，名色有？何法緣故，名色有？』

即正思惟，如實無間等生：『識有故，名色有；識緣故，有名色有。』

我作是思惟時，齊識而還，不能過彼，謂：緣識名色；緣名色六入處；緣六入處觸；緣觸受；緣受愛；緣愛取；緣取有；緣有生；緣生、老、病、死、憂、悲、惱、苦，如是，如是，純大苦聚集。

我時作是念：『何法無故，則老死無？何法滅故，老死滅？』

即正思惟，生如實無間等：『生無故，老死無；生滅故，老死滅。』

如是，生、有、取、愛、受、觸、六入處、名色、識、行廣說。

我復作是思惟：『何法無故，行無？何法滅故，行滅？』

即正思惟，如實無間等：『無明無故，行無；無明滅故，行滅；行滅故，識滅；識滅故，名色滅；名色滅故，六入處滅；六入

處滅故，觸滅；觸滅故，受滅；受滅故，愛滅；愛滅故，取滅；取滅故，有滅；有滅故，生滅；生滅故，老、病、死、憂、悲、惱、苦滅，如是，如是，純大苦聚滅。』

我時作是念：『我得古仙人道，古仙人逕，古仙人道跡；古仙人從此跡去，我今隨去。』

譬如：有人遊於曠野，披荒覓路，忽遇故道、古人行處，彼則隨行。漸漸前進，見故城邑，故王宮殿，園觀、浴池，林木清淨，彼作是念：『我今當往白王令知。』即往白王：『大王！當知：我遊曠野，披荒求路，忽見故道、古人行處，我即隨行。我隨行已，見故城邑，故王宮殿，園觀、浴池，林流清淨。大王可往，居止其中。』王即往彼，止住其中，豐樂安隱，人民熾盛。

今我如是，得古仙人道，古仙人逕，古仙人跡；古仙人去處，我得隨去，謂八聖道：正見，正志，正語，正業，正命，正方便，正念，正定。我從彼道，見老、病、死，老、病、死集，老、病、死滅，老、病、死滅道跡。見生……有……取……愛……受……觸……六入處……名色……識……行，行集，行滅，行滅道跡。我於此法，自知、自覺，成等正覺。為比丘、比丘尼、優婆塞、優婆夷，及餘外道，沙門，婆羅門，在家、出家，彼諸四眾，聞法正向，信樂知法善，梵行增廣，多所饒益，開示顯發。」

佛說此經已，諸比丘聞佛所說，歡喜奉行。